

類分正訂

編全集文室永飲

出書新上
版局民海



正訂 分類飲冰室文集全編 卷十五

文苑

飲冰室詩話

我生愛朋友。又愛文學。每於師友之詩文辭。若學情惻輒誦讀之。以印於腦。自忖於古人之詩。能成誦者寥寥。而近人詩則數倍之。殆所謂豐於昵者耶。其鴻篇鉅製。洋洋洒洒者。行將別哀錄之爲一集。亦有東麟西瓜。謹記其一二者。隨筆錄之。

譚瀏陽志節學行思想。爲我中國二十世紀開幕第一人。不待言矣。其詩亦獨闢新界。而淵含古聲。丙申在金陵。所刻莽蒼齋詩。自題爲三十以前舊學。第二種。蓋非其所自意者也。瀏陽殉國時。年僅三十二。故所謂新學之詩寥寥極希。余所見惟題麥孺博扇有感舊四首之三。其一曰。無端過去生中事。兜上朦朧業眼來。燈下燭骸誰一劍。尊前屍塚夢三槐。金裘噴血和天鬪。雲竹聞歌匝地哀。徐甲儻容心懺悔。願身成骨骨成灰。其二曰。死生流轉不相值。天地翻時忽一逢。且喜無情成解脫。欲追前事已溟濛。桐花院

落烏頭白。芳草汀洲。雁淚紅。再世金環彈指過。結空爲色。又俄空。其三曰。柳花夙有何冤業。萍末相遭乃爾奇。直到化泥方是聚。祇今墮水尙成離。焉能忍此而終古。亦與之爲無町畦。我佛天親魔眷屬。一時撒手却僧祇。其言沈鬱哀豔。蓋瀏陽集中所罕見者。不知其何所指也。然遣情之中。字字皆學道有得語。亦瀏陽之所以爲瀏陽。新學之所以爲新學與。

戊戌去國之際。所藏書籍。及著述舊稿。悉散佚。顧無甚可留戀。數年來所出入於夢魂者。惟一菊花硯。硯爲唐瀏陽所贈。時余承乏湖南時務學堂講席。初與紱丞定交也。譚瀏陽爲之銘曰。空花了無真實相。用造簡偈起衆信。任公之研佛塵贈。兩君石交我作證。其時江建霞方督湘學。受代去。瀕行前一日來作別見。研與銘乃爲余刻之。今贈者銘者刻者皆已沒矣。而此研復飛沈塵海。消息杳然。恐今生未必有合併時也。念之淒咽。

近世詩人能鎔鑄新理想。以入舊風格者。當推黃公度。丙申丁酉間。其人境樓詩稿本。留余家者兩月餘。余讀之數過。然當時不解詩。故緣法淺薄。至今無首能舉其全文者。殊可惜也。近見其七律一首。亦不記全文。惟能誦兩句云。文章巨蟹橫行日。世界羣龍見首時。余甚愛之。

嚴又陵哲學大家。人多知之。至其詩才之淵懿。或罕知者。余記其戊戌八月感事一首云。求治翻爲罪。明

時誤愛才。伏尸名士賤。稱疾詔書哀。燕市天如晦。天南雨又來。臨河鳴犢歎。莫遣寸心灰。又綠珠詞一首。云。情重身難主。淒涼石季倫。明珠三百琲。空換墜樓人。蓋哭林晚翠也。

康南海之第二女公子同璧。瑣精史籍。深通英文。去年子身獨行。省親於印度。以十九歲之妙齡弱質。凌數千里之莽濤瘴霧。亦可謂虎父無犬子也。近得其寄詩二章。自跋云。侍大人遊舍衛祇林。壞殿頽垣。佛法已劫。然支那女士來遊者。同璧爲第一人矣。詩云。合衛山河歷劫塵。布金壞殿數三巡。若論女士西遊者。我是支那第一人。靈鷲高峯照暮霞。淒迷塔樹萬人家。恆河落日滔滔盡。祇樹雷音付落花。

高平子以所著平等閣筆記見寄。記述兩年來都中近事。字字令人刺心。怵目。中一條其事甚韻。而其人甚奇者。讀之亦可見中國女權消息之一斑也。錄其全文如下。庚子仲冬。由日本西京偕日友數人。乘玄海丸返國。便途得游朝鮮及關東關外諸地。雨雪載途。寒風砭骨。哀鴻遍野。春燕無暹。觸目心傷。魂難鬱悒。余有詩云。關山一任誰家物。觸眼吾民百感傷。雪漫長空風滿地。汽車載夢過遼陽。一日薄暮。將投逆旅。適一女子。姿容倩雅。妝服淡素。冷月凝暉。寒山蹙翠。攜一姥一僕。匆匆更望北發。余心訝之。入旅店中。見壁間題詩數首。墨痕未乾。字體秀逸。其一云。本是明珍自愛身。金鑪香擁翠裘輕。誰爲拋卻鄉關道。白雪蒼波無限程。其二曰。明鏡紅顏減舊時。寒風似翦翦冰肌。傷心又是榆關路。處處風翻五色旗。其三

云。無計能醒我國民。絲絲情淚搵紅巾。甘心異族欺凌慣。可有男兒憤不平。尙有一首。字體潦草。不能辨識。噫嘻。此何人也。問之逆旅主人。茫然不答。

希臘詩人荷馬。

舊譯作和英耳

古代第一文豪也。其詩篇爲今日攷據希臘史者。獨一無二之祕本。每篇率萬數

千言。近世詩家。如莎士比亞、彌兒敦、田尼遜等。其詩亦動數萬言。偉哉。勿論文藻。卽其氣魄。固已奪人也。中國事事落他人後。惟文學似差可頡頏西域。然長篇之詩。最傳誦者。惟杜之北征。韓之南山。宋人自稱爲日月爭光。然其精深盤鬱。雄偉博麗之氣。尙未足也。古詩孔雀東南飛一篇。千七百餘字。號稱古今第一長詩。詩雖奇絕。亦只兒女子語。於世運無影響也。中國積習。薄今愛古。無論學問文章事業。皆以古人爲不可幾及。余生平最惡聞此言。竊謂自今以往。其進步之遠。軼前代。固不待蓍龜。卽並世人物。亦何遽讓於古所云哉。生平論詩。最傾倒黃公度。限未能寫其全集。頃南洋某報。錄其舊作一章。乃煌煌二千餘言。真可謂空前之奇構矣。荷莎彌田諸家之作。余未能讀。不敢妄下比隣。若在震旦。吾敢謂有詩以來。所未有也。以文名名之。吾欲題爲印度近史。欲題爲佛教小史。欲題爲地球宗教論。欲題爲宗教政治關係說。然是固詩也。非文也。有詩如此。中國文學界。足以豪矣。因亟錄之。以餉詩界革命軍之青年。

大風西北來。搖天海波黑。茫茫世界塵。點點國土墨。雖曰中國海。無從問禹迹。近溯唐南蠻。遼遠漢西城。舊時職貢圖。依稀猶可識。自明遣鄭和。使節馳絡繹。凡百馬流種。各各設重驛。金葉鑄多羅。玉環獻摩勒。每以佛光明。表頌帝威德。蘇祿率羣臣。淳泥挈盡室。闌斑披實綬。扶服拜赤帟。是誰蠻夷長。竊號公侯伯。比古小諸侯。尙足稱蒲璧。其他烏了帥。爭亦附商舶。有詔鎮國山。碑立高百尺。以此明德意。比刻之罟石。及明中葉後。朝貢暫失職。豈知嘉爾國。既經三四摘。鐵圍薄福龍。太半供鳥食。我行過九真。其次泊息力。婆羅左右望。羣島比蟻虱。咸歸西道主。盡披漢赤幟。日夕興亡淚。多於海水滴。行行復行行。便到獅子國。

浩浩象口水。流到硃伽山。遙望宰堵坡。相約僧躋攀。中有臥佛像。文六金身堅。右疊重累足。左握光明拳。雖具堅牢相。軟過兜羅綿。水田脫淨衣。髻雲惟華鬢。大青髮屈蠡。團金耳垂環。就中白毫光。普照世大千。八十種好相。一一功德圓。是誰攝巧匠。上登忉利天。刻此牛頭檀。妙到秋毫巔。或言佛涅槃。婆羅雙樹間。此卽茶維地。斯語原訛傳。惟佛有神力。高據兩山顛。至今雙足迹。尙隔十由延。或言古無人。只無龍鬼仙。其後買珠人。暫次成市廛。此亦造妄語。有如野狐禪。實則經行地。與佛大有緣。參天貝樹多。由此枝葉繁。獨怪如來身。不坐千葉蓮。既付金縷衣。何不一啓顏。豈真疲津梁。老矣倦欲眠。如何沈沈

睡。經過三千年。

吁嗟佛滅度。世界眼盡滅。最光王舍城。大闢禪師窟。迦葉與阿難。結集佛所說。爾來一百年。復見大會設。恆河左右流。漣漣聲不絕。其後阿育王。第一信佛法。能役萬鬼神。日造八萬塔。舉國施與佛。金榜國門偈。九十六外道。羣言罷一切。復遣諸弟子。分受十萬偈。北有大月氏。先照佛國月。四開無遮會。各運廣長舌。漢家通西域。聲教遠相接。金人一入夢。白馬來負笈。繩行復沙度。來往踵相躡。總持四部重。譯多於髮。華言通梵語。衆推秦羅什。後分律法論。宗派各流別。要之佉盧字。力大過蒼頡。南有獅子王。鑿字赤銅鑠。當時東西商。互通度人筏。但稱佛弟子。能闢鬼羅刹。遂使諸天經。滿載商人篋。烏喙荊子洲。畏鬼性駭怯。一聞地獄說。心畏腴摩殺。賴佛得庇護。無異棲影鷁。國主爭布金。妃后亦託鉢。尊佛過帝天。高供千百氎。樂奏梵音曲。訟聽番佛決。向來文身人。大半著僧衲。達摩渡海來。一花開五葉。語言與文字。一掃付抹撥。十年勤面壁。一燈傳立雪。直指本來心。大聲用棒喝。非特道家流。附會入莊列。竟使宋諸儒。沿襲事剽竊。最奇宗喀巴。別得大解脫。不生不滅身。忽然佛復活。西天自在王。高踞黃金榻。千百氎裘長。膜拜天上謁。西戎犬羊性。殺人日流血。喃喃誦經聲。竟能消殺伐。藏衛各蕃部。無復事鞭撻。卽令奔巴瓶。改法用金桮。論彼象教力。羣胡猶震懼。綜佛所照臨。竟過九洲闊。極南到朱波。窮北蟻

鞅鞅大東波日本。天皇盡僧牒。此方護佛齒。彼土迎佛骨。何人得鉢緣。某日是箭節。莊飾紫金塔。供養白銀闕。倒海然脂油。震雷响金鉞。香雲幢幡雲。九天九地徹。五百虎獅象。徧地是菩薩。謂此功德盛。當歷千萬劫。有國賴庇護。金甌永無缺。豈知西域賈。手不持寸鐵。舉佛降生地。一旦盡刼奪。

我聞舒五指。化作獅子雄。能令衆醉象。敗竄頭籠東。何不勅獸王。俾當敵人衝。我聞角大力。手張祖王弓。射過七鐵豬。入地千萬重。何不矢一發。再張力士鋒。我聞四海水。悉納毛孔中。蛟龍與魚鼈。衆生無不容。何不口一吸。今化諸毛蟲。我聞大千界。一擊成虛空。譬擲陶家輪。極遠到無窮。何不氣一噴。散爲韓藍風。我聞三昧火。燒身光熊熊。千眼金剛杵。頭出煙焰紅。何不呼阿奴。一用天火攻。我聞安息香。力能勅毒龍。尾擊須彌山。波濤聲洶洶。何不呼小婢。悉遣河神從。我聞阿修羅。橫攻善見宮。流盡赤蚌血。藕絲遁無蹤。何不取天仗。壓制羣魔凶。我聞毗琉璃。素守南天封。薜荔鳩盤荼。萬鬼聲喁喁。何不飭鬼兵。力助天王功。惟佛大法王。兼綜諸神通。聲聞諸弟子。遞傳術猶工。如何斂手退。一任敵橫縱。竟使清淨土。概變腥膻戎。五方萬天祠。一齊鳴鐘鼓。遙望西王母。虎齒髮蓬蓬。合上皇帝號。萬寶河朝宗。佛力遂掃地。感歎摧肝胸。佛不能庇國。豈不能庇教。奈何五印度。竟不聞佛號。古有韋陀書。云自梵天造。貴種婆羅門。挾此肆凌傲。凡夫鈍根輩。分定莫能較。自佛倡平等。人各有業報。天堂與地獄。善惡人自召。

卑賤衆首陀。吹螺喜相告。亦有婆羅門。漸漸服教導。食屑鶉鳩行。夜夜鶴鷄叫。塗炭身半裸。拜月脚左
蹠。各棄事天業。迴向信三寶。大地閻浮提。慈雲徧覆幬。何意梵志輩。勢盛復鼓噪。灰死火復然。尾大力
能掉。別創溫都名。布以人皇詔。佛頭橫着羹。訶罵雜嘲諷。盡驅出家人。一一出邊徼。外來波斯胡。更立
天神廟。千牛祭火光。萬馬拜日曜。詞後摩訶末。採集各經要。一經衍聖傳。一劍鎮羣暴。謂此哥羅尼。實
以教忠孝。天使乘白馬。口宣天所誥。從則升九天。否則殺左道。教主兼霸王。黃屋建左纛。繼以蒙古主。
挾勢尤傑驚。以彼轉輪王。力大誰敢校。爾來耶蘇徒。徧轉新舊約。戴以通商舶。助以攻城礮。謂天只一
尊。獲罪無所禱。一切土木像。荒誕盡可笑。頂上舍利珠。拉雜付摧燒。竟使佛威德。燈滅樹傾倒。摩耶撫
鉢哭。迦葉捧衣悼。象法二千年。今日末劫到。惡王魔波旬。更使衆魔嬈。天龍八部衆。誰不生悲惱。噫嗟
五大洲。立教幾教皇。惟佛能大仁。首先唱天堂。以我悲憫心。置人安樂鄉。古分十等人。貴賤如畫疆。惟
佛具大勇。自棄銅輪王。衆生例平等。一律無低昂。罪畏末日審。報冀來世償。佛說有彌勒。福德莫可嘗。
將來僧祇劫。普渡胥安康。此皆大德慧。傾海誰能量。古學水風火。今學聲氣光。辨才總無礙。博綜無不
詳。獨惜說慈悲。未免過主張。臂稱窮餒肉。身供臥虎糧。左手割利刃。右手塗檀香。冤親悉平等。善惡心
皆忘。愈慈愈忍辱。轉令身羸尪。獸啼交鳥跡。一聽外物戕。人間多虎豹。天上無鳳凰。虎豹富筋力。故能

恣強梁。鳳凰大文彩。毛羽易摧傷。惟強乃秉權。強權如金剛。吁嗟古名國。興廢殊無常。羅馬善法律。希臘工文章。開化首埃及。今亦歸淪亡。念我亞細亞。大國居中央。堯舜四千年。聖賢代相望。大哉孔子道。上繼皇哉唐。血氣悉尊親。聲名被八荒。到今四夷侵。盡徵諸邊防。天若祚中國。黃帝垂衣裳。浮海率三軍。載書使四方。王威鎮象主。鬼族馴狼臙。歸化獻赤土。頌德歌白狼。共尊天可汗。化外育來航。遠及牛賀洲。鞭之如羣羊。海無烈風作。地降甘露祥。人人仰震旦。誰侮黃種黃。弱供萬國役。治則天下強。明王久不作。四顧心茫茫。

往讀明詩。見劉誠意集中一篇。一千三百餘言。構思之奇。遣語之險。亦可爲吾詩界中放一異彩。雖然。長篇詩爲長短句者不難。而五言最難。爲奇險語有壯采者不難。爲莊嚴語有風格者最難。吾重公度詩。謂其意象無一襲昔賢。其風格又無一讓昔賢也。請兩錄之。以資比較。

憶昔盤古初開天地時。以土爲肉石爲骨。水爲血脈天爲皮。崑崙爲頭顱。江海爲胃腸。嵩嶽爲背脊。其外四岳爲四肢。四肢百體咸定位。乃以日月爲兩眼。循環照燭三百六十骨節。八萬四千毛竅。勿使淫邪發洩生瘡痍。兩眼相逐走不歇。天帝愍其勞。逸不調生病患。甲命守以兩鬼。名曰結璘與鬱儀。鬱儀手足三足老鴉。腳踏火輪蟠九螭。咀嚼五色若木英。身上五色彩陸離。朝發陽谷暮金樞。清晨還上扶

桑枝。揚鞭驅龍扶海若。蒸霞沸浪煎魚龜。輝煌焜耀啓幽暗。燠煦草木生芳蕤。結璘坐在廣寒桂樹根。漱嚙桂露芬香菲。啖服白兔所搗之靈藥。跳上蟾蜍背脊騎。插光弄影蕩雲漢。閃爍燦壁葩花摘。才摘桂樹子。撒入大海中。散與蚌蛤爲珠璣。或落巖谷間。化作珣玕琪。人拾得喫者。胸臆生明聲。內外星官各職職。惟有兩鬼兩眼晝夜長相追。有物來掩犯。兩鬼隨卽揮刀鉞。禁制蝦蟆與老鴉。低頭屏氣服役使。不敢起意爲姦欺。天地憐兩鬼。暫放兩鬼人間埃。一鬼乘白狗。走向織女黃姑磯。槌河鼓。襄兩旗。跳下黃初平牧羊羣。烹羊食肉口吻流膏脂。却入天台山。呼龍喚虎聽指麾。東岩鑿石取金卵。西巖掘土求瓊威。岩匐洞春石梁折。驚起五百羅漢半夜撥刺衝天飛。一鬼乘白豕。從以青羊青兔赤鼠兒。便從閑道出西清。入少微。浴咸池。身騎青田鶴。去採青田芝。仙都赤城三十六洞主。騎鸞翳鳳來陪隨。神魁清唱毛女和。長煙裊裊飄熊旂。蜚廉吹笙虎擊筑。罔象出舞奔馮夷。兩鬼自從天上別。別後道路阻隔不得相聞知。忽聞塞山子。往來說因依。兩鬼各借問。始知相去近不遠。何得不一相見。鉞情詞。情詞不得鉞。焉得不相思。相思人間五十年。未抵天上五十炊。忽然宇宙變差異。六月落雪冰天達。覆巖山上作窟穴。蛇頭生角角有歧。鰐魚掉尾斫折巨鼈脚。蓬萊宮倒水沒湄。櫓槍枉矢爭出逞妖怪。或大如甕盎。或長如委蛇。光灼灼。形躑躑。叫鹿豕。呼熊羆。煽吳回。翔魃魍。天地左右無扶持。蚊蟲蚤虱蠅蛄蜚。嚼

膚啞血圖飽肥。擾擾不可揮。筋節解折兩眼蠟。不辨妍與媼。兩鬼大惕傷身。如受榜笞。便欲相約討藥。與天帝醫。先去兩眼翳。使識青黃紅白黑。便下天演天一水。洗滌盤古腸胃心腎肝肺脾。却取女媧所搏黃土塊。改換耳目口鼻牙舌眉。然後請軒轅邀伏羲。風后力牧老龍吉。泰山稽命魯般詔工倕。使豐隆役黔羸。礪斧具鎡錘。取金蓐收。伐材尾箕。修理南極北極樞。幹運太陰太陽機。檄石皇地示。部署岳瀆神。受約天皇塋。生鳥必鳳皇。勿生梟與鴟。生獸必麒麟。勿生豺與狸。生鱗必龍鯉。勿生蛇與蠃。生甲必龜貝。勿生蠪與蜺。生木必松楠。生草必薺葵。勿生鉤吻含毒斷人腸。勿生枳棘覃利傷人肌。螟蝗害禾稼。必絕其蟊賊。虎狼防畜牧。必遏其孕孽。啓迪天下蠢蠢氓。悉蹈禮義尊父師。奉事周文公。魯仲尼。曾子與孔子。思敬習書易禮樂春秋詩。履正直。屏邪歆。引頑歸。入規矩。雍雍熙熙。不凍不餓。避刑遠罪。趨祥祺。謀之不能行。不意天帝錯怪。悲謂此是我所當爲。眇眇末兩鬼。何敢越分生思惟。嗷嗷向瘖盲。洩漏造化微。急詔飛天神王與我捉此兩鬼。拘囚之。勿使在人寰。做出妖怪奇。飛天神王得天地詔。立召五百夜叉帶金繩。將鐵網。尋蹤逐跡。莫放兩鬼走。逸入嶽巖。五百夜叉箇箇口吐火。搜天刮地走不疲。吹風放火烈山谷。不問杉柏樗櫟蘭艾高芷蘅茅茨。燔爇熨灼無餘遺。搜到九萬九千九百九十九切幽谷底。捉住兩鬼。眼睛光活如琉璃。養在銀絲鐵柵內。衣以文采食以麋。莫教突出籠絡外。踏折地。

軸傾天維。兩鬼亦自相顧笑。但得不寒不餒長樂無憂悲。自可等待天帝息怒解猜惑。依舊天上作伴同遊戲。

陳伯嚴吏部。義甯撫軍之公子也。與譚瀏陽齊名。有兩公子之目。義甯湘中治蹟。多其所贊畫。其詩不用新異之語。而境界自與時流異。醴深俊微。吾謂於唐宋人集中。罕見倫比。記其贈黃公度一首云。千年治治亂今日。四海蒼茫到異人。欲挈顏流還孔墨。可憐此意在埃塵。勞勞歌哭昏連曉。歷歷肝腸久更新。同倚斜陽看雁去。天迴地動一沾巾。

吳君遂刑部。武壯公長慶子也。以氣節聞一時。丁酉抗疏陳時事。請變法。格不得達。浩然挂冠歸。近頃復上疏。請歸政。迴鑾以後。薄海所想望者。惟此一舉。然莫敢言也。惟君毅然犯政府所最忌而言之。其所養可知矣。其詩肖其爲人。所著有北山樓集。宋平子跋之云。五言古體多似陶韋。五言律體多似少陵。七言律體真逼江西諸祖。蓋道實也。吾最愛其「支那有一士」兩章。其一云。支那有一士。跋涉居越東。拉志希純素。篤性秉淵冲。意曠九洲外。神遊三代中。如傷倦心目。無告哀殘癰。一夫苟不獲。叢疚在厥躬。陳詞就重華。問道訪崆峒。著書累萬言。吾道未終窮。哲人不偶世。至論無污隆。豈惟躋小康。將以致大同。揆策獻太平。疇能識王通。抱玉貴善藏。活國俟良工。感子他山意。錯石資磨礱。已矣吾何悲。矯首咨鴻濛。

宋平

其二云。支那有一士。戢影居越西。結念抱冰雪。它心高虹霓。慷慨懷前修。惻愴憫羣黎。邱索與興墳。一窮探稽。種界析狼鹿。政教疏羌氏。獨永泰皇祚。屢忤末俗詆。畸士自跡跡。良馬空跌踈。始知間代才。動與世相睽。澄澄之江波。曉日鳴天雞。嶷嶷天台山。仰止難攀躋。賤子奮孤心。逆鱗嘗獨批。荃莫察中情。信讒反怒憐。邪枉固不容。悻直終見擠。三月何皇皇。兩馬猶栖栖。懷哉虞重華。風雨聞弗迷。宣尼未忘魯。子與思王齊。已而復已而。且俟聖人兮。右贈章太炎

又有集句一首云。青天漫漫覆長路。一紙短書無寄處。欲問平安無使來。乃知貧賤別更苦。四時天氣總愁人。秋月春風等閑度。憂患衆兮歡樂鮮。朱顏日夜不如故。嗟余此去其從誰。萬里蒼蒼煙水暮。構雲有高營。祇見石與土。俛視大江奔。幽憤得一吐。我欲凌風翔。轉上青天去。當面輸心背面笑。翻手作雲覆手雨。煙銷日出不見人。至竟江山誰是主。驅使前輩。天衣無縫。而含蓄蘊藉。別有懷抱。余酷愛之。

丁叔雅戶部。雨生中丞子也。卓犖有遠志。憂國如瘡。而詩尤以神味勝。庚子秋。余返滬上。從友人扇頭。見其感事一首云。被髮繭足行。羶羶有人流。泣哀江南。眼前所見皆餘子。大宙之亂何時戡。余絕愛之。謂以二十八字。寫盡當今時局。而自見懷抱。仁言藹如。未有能及此者也。頃從北山樓集。復見其將歸嶺南。留別一首云。百無聊賴過零丁。遙睇中原一髮青。避地詩人哀故國。渡江名士泣新亭。山河運歇英才盡。羣

鼓聲沈戰血腥。鶉首賜秦天亦醉。祇憐羈客獨長醒。絕似劍南學杜諸作也。

吾黨中天才絕特者。未有吾家伯雋孝廉者也。伯雋以辛卯年。與余同游南海先生之門。年方十四。是歲即舉於鄉。當其未禮南海也。碌碌無以異於常兒。一度摩頂受記。夙慧颺發。而尤耽內典。在齋中終日坐禪。少年同學。時或揶揄捉弄之。弗爲動也。其冬。余入都。伯雋贈三詩。其一云。惺惺真宰慎其微。萬象紛紜任所之。客賊並來善相接。佛魔俱掃得堅持。精魂須歷三千劫。大力常周十二時。游刃雖然有餘地。族間猶自見難爲。其二云。長嘯一聲天地寬。翛然來去更無難。崑崙頂上鐵船動。魍魎叢中神劍寒。壁立萬仞皆平地。坐斷十方如是觀。河嶽日星通神氣。周遊磅礴在胸肝。其三云。無明有愛如來種。一片慈悲成此身。軀殼衆生託吾輩。肝腸內熟爲斯人。游行自在虛空架。轉運無方大法輪。七寶莊嚴開世界。卻原步步踏紅塵。十四歲乳臭小兒。何處有此識想。得不歎絕。

南海先生曰。伯雋殆有夙根者。游戲人間耳。顧伯雋寡言。吾無從窺其底蘊。以文字論之。知其非冷腸人也。記其所填詞摸兒魚一闋云。算只有江山無數。怎盛得靈氣住。氣吞地球常八九。渺爾衆生何有甚情緒。向百尺高樓。觀看行人路。滿城簫鼓。算愁裏無人。夢中無地。獨自任情苦。秋風起。春草春花又暮。忍見陀城煙樹。蕭蕭馬鳴催落日。弄得老天憔悴我何顧。算萬里堂堂。猶是神州土。笑聲歸去。待日闌雲冥。風

狂雨橫。重覓舊游處。又金縷曲一闋。記其末四句云。他若有情吾能見。吾有情更待向誰說。空佇立。肝腸熱。然則伯雋豈忘世者耶。記昔嘗責備之。伯雋曰。我今日正在臥薪嘗膽的時候。但薪胆生涯。忽忽十年矣。海內風雲。如此其急。而小舍利弗。尙不肯出定。吾又能無憾也。作方略考健忘不能全其詞也

譚瀏陽之得於佛學。知瀏陽皆能言之。然瀏陽之學佛。實自金陵楊仁山居士。其遺詩有金陵聽說法一章。卽居士所說。詩云。而爲上首普觀察。承佛威神說偈言。一任法田賣人子。獨從性海救靈魂。綱倫慘以喀私德。法令盛於巴力門。大地山河今領取。菴摩羅果掌中論。此詩無刻本。見麥孺博筆端。瀏陽手書也。達縣吳季清先生德瀟。作令西安。庚子義和之變。爲亂民所戕。闔門及難。識與不識。莫不痛心。天之報施善人。真其誣哉。先生至德純孝。而學識魄力。迥絕流俗。尤邃佛理。自號雙遣居士。有子三人。長曰鐵樵。名樵。次曰仲駿。名以榮。季曰子發。名以東。皆有過人之才。余與譚瀏陽及鐵樵約爲兄弟交。而父事季清先生。乙未秋冬間。同客京師。吾三人者。連興接席。未嘗一日相離也。丙申五月。鐵樵以暴病卒於漢口。瀏陽時在滬。哭之慟。嘗爲作一傳。見時務報中。未幾季清先生之官山陰。瀏陽贈一詩云。此生當補他方佛。何意微塵補一官。□□□□□□延陵魂氣北邙寒。下蓋弔之者也。以東當乙未。年僅十一。隨侍入都。風采英發。徧交一時名士。瀏陽戲號之曰舍利佛。以其早慧也。丙申受學於余者一年。日讀書盡十餘卷。屬

文能二三千言。兼學英法文字。而仲弢亦來居滬上。綜核善治事。瀏陽語余曰。三吳蜀之三龍也。吾國有此等人才。豈是亡國氣象。而不意鐵樵無端以死。而兩弟亦隨季清先生斃於毒刃也。庚子夏。余在夏威夷島。得仲弢一書曰。舍利佛每言及公。卽涕不可止。余重感之。重悲之。乃書未及答。而凶耗已聞。天之喪斯夫。復何言。報中見黃公度庚子三哀詩。其一卽季清先生也。記其數聯云。以君精佛理。夙通一切法。明知入世事。如幻如泡沫。佛力尙有盡。何況身生滅。將頭臨刃時。定知不驚但。讀此亦可以略窺先生之學矣。譚瀏陽獄中絕筆詩。各報多登之。日本人至譜爲樂歌。海宇傳誦。不待述矣。但其詩中所指之人。或未能知之。今錄原文略加案語。詩曰。望門投止思張儉。忍死須臾待杜根。我自橫刀向天笑。去留肝胆兩崑崙。所謂兩崑崙者。其一指南海。其一乃俠客大刀王五。瀏陽作吳鐵樵傳中。所稱王正誼者是也。王五爲幽燕大俠。以保標爲業。其勢力範圍。北及山海關。南及清江浦。生平專以鋤強扶弱爲事。瀏陽少年嘗從之受劍術。以道義相期許。戊戌之變。瀏陽與謀。奪門迎辟。事未就而瀏陽被逮。王五懷此志不衰。庚子八月。有所布畫。忽爲義和團所戕。齎志以沒。嗚呼。王五眞男兒。不負瀏陽矣。

余識唐瀏陽最晚。乙未秋。與瀏陽定交。叩其友。則曰。二十年刎頸交絨丞一人而已。余心識之。丁酉冬。講學長沙。譚公乃爲余兩人介紹焉。譚公之成仁也。唐公慟哭辭家。欲如京師收葬。至上海。則譚公忠骸已